

佛說越難經

西晉清信士聶承遠譯

聞如是一時佛在波羅柰私國賢者飛鳥聚是時國中有四姓長者名曰越難大豪貴珍琦珠寶牛馬田宅甚衆多難爲人慳貪嫉妬不信道德不喜布施日未沒常勅門監有來乞者勿得通之難有一子名栴檀亦復慳貪難後壽盡還生其國中爲盲乞婦作子其夫言汝身有重病今復懷軀我以貧窮無以衣食汝便自去婦受教出門外未遠得大聚糞便止其中至九月生一子兩目悉盲其母乞食養之至年七歲母言我養汝大久且自行持杖取食器行乞當自悲言世間貧者最爲苦惱今我薄命生貧家兩目復盲無所見者復爲人所輕易今與我少所飲食愈我飢者

譬如天雨渴者得飲兒聞母說如是便行家乞匄復到栴檀家其子適到時守門者暫小出盲兒徑入至中庭如母教說之時栴檀在高樓上聞其言大怒便呼守門者問之誰內此盲乞兒者監門人大懷即掣盲兒撲於門外傷其頭面復折其右臂壞其食器飯散於地身體大痛兒叫呼悲啼其母聞之即走到見所何等弊人燒我子者我子尚小兩目復盲有何等過而取之爾何一感天兒對母言我至此門中乞有高聲人呼多力人掣撲折傷我體大痛如是今且死不久時門上有守神謂之言汝得是痛尚爲小耳其大在後汝坐前世有財不布施今故得勤苦世間富貴無有常富貴而不布施如無有財等耳死更苦痛迺愁悔當復何益如是觀者甚衆多

各各自語其聲遠聞佛時從念道覺與諸比丘俱入城分衛遙見之便問阿難是何等聲忽忽適如是阿難白佛說盲兒子母本末已便叉手白佛願哀憐到此兒所佛默然不應分衛還飯已便往視之見盲兒瘡痛以手摩其頭目便即開折傷處即愈因自識宿命佛問汝是前世長者字越難不對言是也佛告阿難人居世間甚勤苦愚癡一世父子不相識知佛故說偈言

人求子索財

教十

於此二事中

十三

甚憂勤苦痛

他人而得果

有身不能保

何況子與財

譬如夏月暑

息止樹下涼

須臾當復去

世間無有常

阿難白佛此兒命盡當趣何道佛言當入大泥犁中一宿佛說是經時八萬餘人皆棄三

垢得法眼諸弟子皆歡喜爲佛作禮而去

佛說越難經